

- UVOD -

OMLADINSKI RESURSNII CENTAR (ORC) TUZLA; OMLADINSKA MREŽA BOSNE I HERCEGOVINE

Omladinska mreža Bosne i Hercegovine je neformalni skup vanstranačkih organizacija, grupa i osoba koje zadovoljavaju potrebe mladih u entitetima, aktivno ih uključujući u izgradnju demokratskih vrijednosti i jačanje civilnog društva. (Misija hCa Omladinske mreže u Bosni i Hercegovini, ustanovljena na radionici strateškog planiranja u Kulašima, 11. - 17. juli 1999.g) Danas mreža okuplja 139 članica i 53 pojedinca iz 65 mjesta u BiH (zadnji podatak iz jula 2011. godine, nakon revizije).

Dragi prijatelji, pred vama se nalazi **julsko** izdanje mjesečnog informativnog biltena Omladinskog Resursnog Centra (ORC) Tuzla i Omladinske mreže Bosne i Hercegovine.

Bilten izlazi na bosanskom-srpskom-hrvatskom i engleskom jeziku. U njemu se nalaze informacije o aktivnostima Omladinskog Resursnog Centra (ORC) Tuzla, te Omladinske Mreže Bosne i Hercegovine, informacije o mjesečnim aktivnostima omladinskih organizacija i grupa - članica ove mreže, njihovi planovi za naredni period, te ostale korisne informacije (donatori, pozivi na konferencije i seminare, školarine stipendije...).

Ukoliko želite da budete na mailing listi za naredna izdanja mjesečnog informativnog biltena ili ako imate pitanja ili sugestije, javite nam se. Mjesečni informativni bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

<http://www.omladina-bih.net>

Uživajte u čitanju!!

SADRŽAJ

Aktivnosti u julu 2011.	2
Planovi za avgust 2011.	4
Aktivnosti dijela članica mreže	5
Nove članice	14
Informacije/pozivi/seminari	15
Donatori, školarine, stipendije	16

AKTIVNOSTI hCa/ORC-a U JULU 2011.

• III SASTANAK ALF MREŽE BIH

U Tuzli je, u periodu od 30. juna do 1. jula održan sastanak Upravnog odbora ALF BiH, sastanak članica partnera u zajedničkoj aktivnosti ALF BiH - Promocija „10 otvorenih gradova BiH“ u polju suživota i multikulturalnog života, te aktivnih članica ALF BiH. Na sastanku je učestvovalo dvadesetak predstavnika organizacija – članica ALF BiH. Tokom dva dana razgovaralo se o dosadašnjim aktivnostima unutar mreže, aktivnostima članica na implementaciji zajedničkih aktivnosti, te su dogovorene buduće aktivnosti. Zaključci radnih grupa na sastanku ALF BiH su:



• Radna grupa za izradu PR strategije:

- Facebook fan page je već kreiran (GEC, Emir Vildić) i ubuduće će se koristiti za promociju mreže i aktivnosti mreže ALF BiH;
- Dodati će se linkovi svih organizacija članica ALF Mreže BiH (onih koje imaju internet prezentacije ili FB stranice ili grupe);
- Obavijestiti će se članice ALF Mreže BiH o postojanju mogućnosti FB prezentacije;
- Na Wikipediji dodati članak na našim jezicima tj. biografiju Anne Lindh (koja je već urađena), te linkovati sa FB profilom ALF Mreže BiH;
- Redovna saopštenja za medije;
- Napraviti zahtjev za izradu PR promotivnog materijala za ALF Mrežu BiH (ORC Tuzla će uputiti dopis sekretarijatu ALFa u Aleksandriji), Sanus Prijedor će pomoći sa dizajnom ukoliko sredstva budu odobrena;
- Arhiva i medijski izvještaji se već prikupljaju;
- Baza medija postoji.



• Radna grupa za izradu strategije umrežavanja sa drugim mrežama i institucijama:

- Razmjena informacija sa drugim mrežama kao što su: Omladinska mreža BiH, Mreža za izgradnju mira, Regionalna inicijativa protiv diskriminacije, hCa međunarodna mreža, Međunarodna Romska mreža, Ostale ALF mreže (42 mreže), 3400 e-mail adresa pojedinaca i organizacija (2000 na BHS jezicima i 1400 na engleskom jeziku).
- Upućen je zahtjev za podršku Ministarstvu vanjskih poslova BiH te je dobivena usmena podrška za aktivnosti mreže.
- Uputiti projekat ka Ministarstvu civilnih poslova kada izađe javni poziv za financiranje.
- Uputiti zahtjev za sponzorstvo ka društveno osviještenim firmama u BiH.
- Uputiti zahtjev ambasadama u BiH i ambasadama BiH u inostranstvu za podršku ALF Mreži BiH.



- **Radna grupa za izradu alata za monitoring i evaluaciju rada ALF Mreže BiH:**
 - Napraviti će se formular za evaluaciju mreže (IMIC, Sarajevo)
- **Radna grupa za izradu Pravilnika o radu Skupštine ALF Mreže BiH:**
 - Uskladiti, dopuniti i donijeti kodekse mreže;
 - Sastaviti dokument „Sporazum o radu mreže ALF Mreže BiH“ koji će kao anekse sadržavati Interni pravilnik i ostale kodekse;
 - „Sporazum o radu mreže ALF Mreže BiH“ će biti ponuđen na konsultacije članicama ALF Mreže BiH putem e-mail-a a članice mreže će imati 20 dana da daju primjedbe i sugestije. Upravni odbor usvaja ili odbija primjedbe i sugestije do 10.10.2011. ili sljedećeg sastanka UO. „Sporazum o radu mreže ALF Mreže BiH“ će biti ponuđen svim članicama na potpisivanje na godišnjem sastanku ALF Mreže BiH. „Sporazum o radu ALF Mreže BiH“ je obavezujući za sve članice koje potpišu.

• PROJEKAT ALTYO

U okviru projekta ALTYO, a u organizaciji PRONI Brčko u Brčkom je od 4. do 6. jula održan trening sa temom "Pravni okvir i istraživačke tehnike". Trening je održan u Omladinskom Centru u Brčkom. Ispred Omladinskog Resursnog centra treningu je prisustvovao Miralem Tursinović.



• "OUR STATE - OUR SOCIETY - OUR WAY?"



U Jajcu, od 28. do 31. jula, je održan seminar "**Our State - Our Society - Our Way?**" ("Naša država – Naše društvo – Naš način?") organizovan od strane Švicarskog helsinškog komiteta u saradnji sa Omladinskim resursnim centrom Tuzla i Omladinskim centrom Jajce. Na seminaru je prisustvovalo oko 30-ak mladih ljudi iz Bosne i Hercegovine i Švicarske koji su bili podijeljeni u četiri radne grupe: Ljudska prava i demokratija, Mediji i demokratija - nezavisnost i kontrola, Donošenje odluka u demokratiji i Socijalna i društvena pitanja.

Radne grupe su bile vođene od strane dva moderatora, jednog iz Švicarske i jednog iz Bosne i Hercegovine. Tijekom četiri dana, uz druženje i rad u grupama, mladi su imali šansu upoznati se, razmijeniti mišljenja i steći nova iskustva u polju demokratije i ljudskih prava. Na kraju seminara je proizašlo mnogo kvalitetnih zaključaka i ideja među kojima su i ideja za nastavak seminara koji će se održati u Švicarskoj, te konferencija mladih u Sarajevu BH Youth Days.

Predstavnik ORC/hCa na ovom seminaru je bio Semir Selimović.



Tokom jula radili smo i na:

- *Održavanju i razvoju komunikacija i kordinacije unutar Omladinske Mreže Bosne i Hercegovine:*
 - svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH (pozivi na radionice, seminare, konferencije, pozivi za projektne aplikacije, poslovi, školarine, ostale aktivnosti);
 - održavali i redovno dopunjavali informacije na našoj web stranici www.omladina-bih.net;
 - slali informacije koje smo dobili od omladinskih organizacija i pojedinaca iz mreže prema vani (međunarodnim organizacijama, organizacijama u regionu, donatorima);
 - vršili korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH.

PLANOVI HCA/ORC-A ZA AVGUST

Nastavak rada hCa/ORC Tuzla na redovnoj distribuciji informacija omladinskim organizacijama u Bosni i Hercegovini, kao i uređivanje i distribucija mjesečnog biltena Omladinske Mreže Bosne i Hercegovine;

Izdavanje knjižice sa izvještajima sa javnih tribina / debata koje su partnerske organizacije ALF BiH realizovale u proteklom periodu, u okviru zajedničkih aktivnosti ALF BiH. Cilj ovih debata je poticanje međugeneracijskog dijaloga o kulturalnoj i socijalnoj različitosti kroz simultane događaje. Očekivani rezultati okruglih stolova / debata su razvitak instrumenata za kulturalnu i tradicionalnu prezentaciju manjinskih grupacija u deset gradova u BiH.

Nastavak aktivnosti u okviru Regionalne omladinske akcije protiv diskriminacije i militarizma sa partnerima iz regije.

AKTIVNOSTI ČLANICA OMLADINSKE MREŽE BIH



UDRUŽENJE GRAĐANA "KRIVA RIJEKA"

Solun bb, 71 340 Olovo

Tel./Fax: 032/827-212

E-mail: ug.krivarijeka@hotmail.com

LJETNI MIROVNI KAMP 2011.



U sklopu nastavka Ljetnog mirovnog kampa "Jahorina 2010" ove godine je u period od 09.07.-14.07. 2011. godine nastavljen projekat pod nazivom "Karavan mira". Sve troškove učesnika, djece iz 14 škola, snosio je World Vision.

"Karavan mira" je boravio u hotelu "Board" na Jahorini, gdje im se ovom prilikom zahvaljujemo na visokom i profesionalnom nivou usluga (glavnom kuharu, zatim Midanu, Vladi, Srletu, Oliveri- Olji ... koji su nesebično pomagali i brinuli se o djeci).

„Karavan mira“ je sa svojom performansom nastupao u tri naša grada: Pale, Zenica i Tuzla.

Škole koje su učesnice "Karavana mira" su: Sapna, Orahovac, Caparde, Memići, Kalesija, Rainci Gornji, Tojšići, Vukovije, Kakanj, Visoko, Ročević, Kozluk, Čelopek i Olovo. Nastavnici koji su bili pratioci i zaduženi za pažnju i zaštitu djece su: Alisa, Marina, Snježana, Nisvet, Admir, Nusret, Adis, Isak.

Zahvaljujemo se osoblju ureda World Vision u Tuzli, njihovoj direktorici Veniti te rukovodiocima radionica Maji, Jugiju, Mirzi, Adnanu...





UDRUŽENJE „GRAĐANSKI EDUKATIVNI CENTAR“ TUZLA

Kaldrma 2, 75 000 Tuzla

Tel.: 063 237 134

E-mail: gec@gec.ba

Web: www.gec.ba

• GEC OSTVARIO SARADNJU S MAGAZINOM „LE RESEAU“

U okviru euro-mediteranske platforme za mlade (The Euro-Med Youth Platform) „Građanski edukativni centar“ GEC iz Tuzle dobio je poziv da ove godine učestvuje u kreiranju sedmog po redu godišnjeg magazina „Le Reseau“ koji izlazi na engleskom, francuskom i arapskom jeziku. U ovogodišnjem izdanju Magazina „Le Reseau“ Građanski edukativni centar će imati priliku predstaviti svoje dosadašnje aktivnosti te direktno učestvovati u kreiranju istog.



Emir Vildić, izvršni direktor GEC-a u kratkoj izjavi za portal gec.ba istakao je „Moram priznati da smo svi poprilično ostali iznenađeni kada smo dobili poziv da ove godine učestvujemo u kreiranju ovog eminentnog magazina. Svakako da poziv doživljavamo kao svojevrsno priznanje za naš dosadašnji rad koji je očigledno mnogo više respektovan van granica naše zemlje nego u njoj samoj, apsurdno ali tako je, ali i prilika da uz naše aktivnosti predstavimo grad Tuzlu i državu Bosnu i Hercegovinu, te da istovremeno trasiramo put našim kolegama iz drugih nevladinih organizacija za korištenje istih ili sličnih resursa koji su nam stavljeni na raspolaganje, zaključio je profesor Vildić.



Podsjetimo, osoblje „Građanskog edukativnog centra“ (GEC) u posljednje dvije godine aktivno radi u domenu odgojno obrazovnih i informativnih djelatnosti s namjerom animiranja građana da učestvuju u društvenom životu a u cilju unapređenja građanskog društva kroz programe edukacija kroz formalno učenje i osposobljavanje kadra kao i neformalno učenje te stvaranje pozitivnih navika kod svih kategorija građana u smislu aktivnog odnosa prema društvenim događajima.

• GRAĐANSKA INICIJATIVA „GRAD TUZLA“

Građanski Edukativni Centar (GEC) nakon izvršenog monitoringa odlučio je pokrenuti Građansku Inicijativu pod nazivom „GRAD TUZLA“ s kojom želimo stvoriti pozitivnu naviku kod građana u smislu aktivnog odnosa prema važnom društvenom događaju ali i ukazati na potrebu da Tuzla kao administrativno je sjedište te privredni, kulturni i obrazovni centar Tuzlanskog kantona i ekonomsko-geografske Regije sjeveroistočna Bosna svakako zaslužuje status grada. Građanska Inicijativa „GRAD TUZLA“ je otvorenog karaktera za sve građane i građanke, fizičke i pravne subjekte koji se žele pridružiti istoj. Želimo povećati i podijeliti znanja od značaja za Grad Tuzlu te iste iskoristiti za interaktivnu komunikaciju s građankama i građanima. Prema Parlamentu Federacije i Vladi imamo namjeru uputiti otvoreno pismo te prezentirani aktivnosti i rezultate inicijative s ciljem ukazivanja na evidentan propust nadležnih uz akcenat na rapidnom rješavanju ovog pitanja od interesa za građane Tuzle.



• MUZIČKI EDUKATIVNI PROGRAM AVISTA (MEP AVISTA)



„Građanski edukativni centar“ (GEC) kao organizator i „Škola muzičkih umjetnosti“ (SMU) kao nastavnici su i u julu mjesecu implementaciju MEP Avista. Podsjetimo nastavni proces na MEP-u odvija se planiranim tempom u skladu s nastavnim planom i programom do tri puta sedmično. Učenici u okviru radne sedmice pohađaju individualnu nastavu na odjelima za harmoniku i klavir; osnove teorije muzike pod stručnim nadzorom nastavnika muzike.



UG NVO „VOLONTERI & PRIJATELJI KONJICA“

Civilnih žrtava rata 3, 88400 Konjic

Tel.: 036 730 688, 061 610 127

E-mail: adismuhibic@gmail.com

Web : <http://volonteriprijateljikonjica.blogger.ba/>

• POČELI RADOVI NA UREĐENJU DJEČJIH IGRALIŠTA U KONJICU

Devastirana i nesigurna dječija igrališta slika su i prilika današnjeg Konjica. Iako su novcem jedne norveške humanitarne organizacije odmah po okončanju rata izgrađena tri igrališta za djecu, i to u naseljima Civilnih žrtava rata, Luka i Kolonija do danas ona liče više na sve drugo negoli na ono što im je prvobitna namjena.

Upravo ovakav nemaran odnos mještana i čelnika općine iritirao je grupu građana koji su provodeći javnu kampanju - projekat "Sigurni parkovi za djecu u gradu Konjicu" podigli svoj glas za sigurnija dječija igrališta. Inicijativu za uređenje igrališta i dječjih parkova još 2008. godine pokrenuo je mladi roditelj i entuzijasta Adis Muhibić, lider volontera iz Konjica uz podršku 25 organizacija i 500 potpisa građana. Lokalna lokalna vlast početak radova najavljivala je još od prošlog ljeta.

Da se »vijećanje« lokalne vlasti oko ovog projekta kao i postupak pronalaženja izvođača konačno priveo kraju 16. juna (iako je sve trebalo biti gotovo još ranije), dokazali su i prvi kamioni firme „Gradnja-Konjic“ koji su se pojavili tokom vikenda, a doznajemo da je dovršenje dječjih igrališta planirano još u toku ove godine.



„Naša dugogodišnja borba za djecu i njihova prava u Konjicu nije bila uzaludna. Cilj nam je da poboljšamo kvalitet života zajednice. Istrajno i uporno roditelji i građani Konjica tražili su da se djeca zaštite na igralištima koja su totalno devastirana. Uspjeli smo i prije par godina uticali smo na budžet općine Konjic kako bi se osigurala sredstva neophodna za rekonstrukciju. Mi smatramo da je to nešto jako dobro za našu djecu i da će se konačno osjetiti dječija igra i graja u našem gradu. Sljedeći zadatak za građane ove tri ulice i općine Konjic bit će osmišljavanje modela upravljanja kako bi ona dugoročno zadržala svoju funkciju i sačuvala se od mogućih devastacija“, kazao je Adis Muhibić, glavni koordinator NGG Volonteri i prijatelji Konjica.



Na kraju vrijedi spomenuti, da je inicirajući ovaj projekat i zapaženom građanskom aktivizmu, Muhibić proglašen za najboljeg volontera u BiH za 2008. godinu.



INSTITUT ZA RAZVOJ MLADIH - KULT
Centralni ured Sarajevo (CUS)
Banjska ul. 2, 71 210 Ilidža, Sarajevo
E-mail: kult@mladi.org, www.mladi.org
Tel./fax: 033/637 290, 033 621 351

Otvoreno pismo premijeru FBiH: Gosp. Nikšiću, možete li se pobrinuti za mlade u Federaciji!?

Institut za razvoj mladih KULT protekloga mjeseca uputio je otvoreno pismo premijeru FBiH gosp. Nikšiću zbog institucionalne nebrige prema mladima. Pismo u cijelosti možete pročitati na: www.mladi.org, u projektu *Javna sredstva, računajte na mlade*.

• Jesi li ti bio/la na Danu mladih općine Ilidža?

Tradicionalno, šesti put, u subotu 2. jula u organizaciji volontera/ki Instituta za razvoj mladih KULT, a uz podršku Općine Ilidža i brojnih privrednih društava, održan je *Dan mladih općine Ilidža*. I ove godine manifestaciji mladih za mlade prethodile su obimne i detaljne pripreme volontera/ki, koje su doprinijele bogatom i sadržajnom programu. Dječija radionica *Obojimo ljeto našim bojama* održana je ispred SPAJALICE za učenike/ce od prvog do četvrtog razreda osnovnih škola, kao i za mališane iz vrtića koji su mogli doći sa svojim roditeljima. Za njih je pripremljeno i iznenađenje - animator čije je **Srce puno osmijeha**, a koji je našoj maloj raji pravio razne oblike od balona za modeliranje. *Koncert za sve*, kao drugi dio programa, održan je na Ljetnoj pozornici Ilidža u večernjem terminu. Za izvanrednu atmosferu pobrinule su se mlade nade bh. estradnog neba: Armin Muzaferija, bend Muštuluk, DJ Dinero, mlada hip hop plesna grupa Young Dreamerz, kao i Rijana Jusufbegović.



• Volonteri/ke Fondacije tuzlanske zajednice u SPAJALICI

Volonteri/ke Fondacije tuzlanske zajednice (FTZ) bili su u posjeti Obrazovno-raznodom centru za mlade SPAJALICA. Cilj je bio da se članovi/ice omladinskih klubova iz Tuzle upoznaju s radom Instituta za razvoj mladih KULT. Govorilo se o aktivnim projektima, radu volontera/ki SPAJALICE, te o svim ostalim pitanjima koja su bitna za mlade u nevladinom sektoru, iz perspektive KULTA. Tokom

razgovora tuzlanski volonteri/ke veliku zainteresiranost pokazali su za novi projekt *KULTA Institucionalni dijalog između mladih i vlasti kroz osnivanje vijeća mladih*. Odgovore na postavljena pitanja dobili su iz prve ruke, regionalne savjetnice u projektu. Svoje drage Tuzlake/inje iz FTZ-a pozivamo da nas ponovno posjete, sa željom za mnogo uspjeha i sreće u daljem radu.

- **Molim za pomoć: šta upisati?!**

Njemačko društvo za međunarodnu saradnju - GIZ provodi projekta *Profesionalne orijentacije*, koji se sastoji od pet programskih modula. Početna obuka je održana u SPAJALICI, od 13. – 16. jula o. g. Projekt ima regionalni karakter jer se, osim u BiH, realizira na području Srbije, Crne Gore i Kosova. Osnovni cilj je da učenici/e završnih razreda osnovne škole spoznaju svoje sklonosti i sposobnosti, dobiju dovoljno informacija o perspektivama u zapošljavanju, te o ponudama stručnog obrazovanja kako bi donijeli ispravnu odluku o daljem školovanju. Na obuci za trenere/ice prisustvovali su predstavnici/e omladinskih centara iz Laktaša, Mrkonjić Grada, Vlasenice, Gradačca, Gračanice, Tuzle, Milića, Sarajeva i Ilidže. Nastavak obuke planiran je za septembar.



- **Glavni revizor RS-a Boško Čeko dao podršku KULTOVOJ inicijativi**



Okrugli stolovi o poboljšanju Zakona o reviziji institucija BiH u oblastima revizije učinka i reagiranja Parlamentarne skupštine BiH na nepostupanje po revizorskim preporukama od strane budžetskih institucija održani su u Mostaru i Banjoj Luci. Ovim dvjema raspravama prisustvovali su predstavnici/e Omladinskog kulturnog centra Abrašević, Vijeća mladih Mostar, OSCE-a Banja Luka, Omladinskog savjeta Republike Srpske, UG Tender, Udruženja ekonomista RS, Magazina BUKA i dr. Zaključci s javnih rasprava bit će razmotreni i pretočeni u amandmane na Zakon, te će biti upućeni Uredu za reviziju BiH na mišljenje. Na raspravi u Banjoj Luci

učestvovao je i Boško Čeko, glavni revizor iz Glavne službe za reviziju javnog sektora RS-a. U svojoj je diskusiji istakao da podržava projektnu inicijativu i prijedloge zakonskih izmjena, da postoji potreba očuvanja dostignutog nivoa i jačanja nezavisnosti revizorskih institucija, da bi eventualno zakonsko ovlaštenje o podnošenju prekršajnih i krivičnih prijava moglo ugroziti nezavisnost revizorskih institucija i dr. Pored toga najavio je obavljanje pet revizija učinka u ovoj godini i govorio o pritiscima koje trpe revizori i revizorske institucije.

- **Pismo interesa Općine Velika Kladuša**

Povodom Javnog poziva za učešće u projektu *Institucionalni dijalog između mladih i vlasti kroz osnivanje vijeća mladih* gosp. Admil Mulalić, načelnik Općine Velika Kladuša, uputio je pismo podrške Institutu za razvoj mladih KULT, koje u cijelosti možete pronaći na www.mladi.org. Ovo je samo jedan od pokazatelja važnosti saradnje vladinog i nevladinog sektora na putu razvoja građanskoga društva, te prvi korak u formiranju institucionalne strukture predstavnika mladih koja će im omogućiti sudjelovanje u procesima donošenja odluka.

- **KULT u radnoj posjeti Livnu:**

U okviru inicijative *Lokalno je primarno*, koju provodi OSCE, 7. jula 2011. g. u Livnu održan je radni sastanak s omladinskim organizacijama i predstavnicima općinskih službi koje se bave pitanjima

mladih u Kantonu 10. Učesnici/e su imali priliku upoznati se s definicijama Zakona o mladima FBiH, mehanizmima koje uređuje, te s nalazima istraživanja o strukturama za mlade na lokalnom nivou.

• Održano projektno planiranje

U prostorijama Obrazovno-raznodnog centra za mlade SPAJALICA održano je projektno planiranje za *Institucionalni dijalog između mladih i vlasti kroz osnivanje vijeća mladih*. Trodnevni sastanak, koji je održan od 9. do 11. jula, sastojao se od planiranja regionalnog djelovanja partnera, upoznavanja s pravilnikom o partnerskoj saradnji, te drugim aktivnostima do kraja 2011. g. Planiranje je bila odlična prilika da se partnerske organizacije bolje upoznaju s ciljevima projekta i aktivnostima koje su od velikog značaja za formiranje vijeća mladih u FBiH, te osnaživanja omladinskih savjeta u RS-u.



• Odabrane organizacije iz BiH koje će proći KULTOVU obuku za vijeća mladih

Zadovoljstvo nam je obavijestiti Vas da su odabrane omladinske organizacije za učešće u projektu *Institucionalni dijalog između mladih i vlasti kroz osnivanje vijeća mladih*. Nakon opsežnog pregleda pristiglih prijavnih obrazaca, konačnu odluku donijela je komisija inicijative. Projekt provodi KULTu saradnji s Demokratskom omladinskom organizacijom Velika Kladuša, PRONI-jem iz Brčkog, Omladinskim savjetom Vlasenica, te KULTOM, Ured Gradačac, uz podršku Evropske unije.

• Održana obuka osoblja OSCE-a

Institut za razvoj mladih KULT je 20. i 21. jula održao obuku za službenike/ce OSCE-a. Obuku je organizirao OSCE kako bi se upoznali s projektom *Institucionalni dijalog između mladih i vlasti kroz osnivanje vijeća mladih*, s obzirom da i OSCE radi na formiranju vijeća mladih u nekim općinama BiH. Na obuci se također govorilo i o Zakonu o mladima FBiH, kako uspostaviti vijeće mladih i kako teče proces izrade zakona o volontiranju FBiH.

• KOŠNICA nastavlja sa svojim izvozom

Ni ljetne vrućine nisu bila prepreka da vrijedne pčelice nastave s prikupljanjem meda, pa je puna KOŠNICA bila spremna za izvoz. KOŠNICA je iznjedrila mlade vršnjačke trenerice. Naime, nakon osnovne obuke od 8 tematskih modula, uslijedio je trening za vršnjačke trenerice, koji je imao cilj ojačati trenerske kapacitete u lokalnim omladinskim udruženjima. Tokom treninga polaznice su imale priliku simulirati vođenje radionice i tako steći praktično iskustvo. Završetkom treninga učesnice su dobile certifikate vršnjačkih trenerica koji im pružaju mogućnost samostalnog vođenja radionica odnosno zadržavanja statusa freelancerica. Za drugi dio projekta KOŠNICA planira provesti naprednu obuku za 18 najaktivnijih pčelica.



• Učešće mladih u strateškom razvoju lokalnih zajednica

Juli je bilo vrlo aktivan i radan mjesec u projektu Učešće mladih u strateškom razvoju lokalnih zajednica. Održani su brojni sastanci, radionice i treninzi. Sastanci su organizirani kako bi se uspostavila kvalitetnija saradnja, te identificirali eventualni problemi u provođenju strategija za mlade, kao i evidentirao utjecaj strategije na položaj mladih, u partnerskim općinama.

U Centru za mlade Juvenis u Doboju održan je sastanak KULTA i službenika za mlade Opštine Doboju. Između ostalog, razgovaralo se i o angažmanu polaznika/ca UMID-a tokom obuke i njihovom doprinosu lokalnoj zajednici. Posjeta je uslijedila i Omladinskom centru općine Gračanica. Održan je sastanak sa službenikom za mlade Općine Gračanica, predstavnikom Udruženja ANEA, te polaznicima/ama obuke UMID. Predstavnici Udruženja ANEA i službenik za mlade Općine Gračanica, između ostalog, istakli su da su izuzetno zadovoljni angažmanom polaznika/ca UMID-a tokom obuke kao i njihovim doprinosom lokalnoj zajednici u pisanju projekata i pomaganju rada Omladinskog centra. U prostorijama Omladinskog centra općine Kakanj održan je sastanak sa službenicom za mlade Općine i polaznicima/ama UMID-a. Prema riječima službenice za mlade, izrada strategije prema mladima privodi se kraju, a pridaje joj se veliki značaj jer je ovaj dokument izuzetno važan, kako cijeloj općini, tako i mladima. U KULTU, Ured Gradačac održan je sastanak sa službenicom za mlade Općine i polaznicima/ama UMID-a, kao i predstavnicima KULTA Gradačac. Sastanak je održan u vezi s provođenjem strategije prema mladima, o angažmanu polaznika/ca UMID-a tokom obuke, te njihovom doprinosu lokalnoj zajednici. Iako u općini Gradačac još uvijek ne postoji Omladinski centar, mladi pozitivno pristupaju projektnim aktivnostima, organiziranju radionica, kampova kao i turnira.



• Završena ovogodišnja Škola prijateljstva

Ovogodišnja Škola prijateljstva je završila s aktivnostima. Nakon devetomjesečnog druženja i gotovo 160 radionica, 400 sati druženja i učenja, te 10-ak izleta, došao je ljetni raspust, o kojemu su polaznici/e maštali i s radošću pričali još u toku zimskoga. U posljednjoj sedmici, osim redovnih druženja, učenja i igre, polaznici/e su boravili na Termalnoj rivijeri Ilidža i u Općini Ilidža, u cilju upoznavanja s radom lokalnih vlasti. Šaljemo veliki pozdrav svima iz Škole prijateljstva i pozivamo vas da nam se i naredne godine priključite za nove radne pobjede, druženja i igru.

Lijep pozdrav od Mubine, Amre, Ajle, Hane, Dženana, Edisa, Amine, Admire, Muamera i brojnih drugih volontera/ki Škole prijateljstva!



• Predstavnici/e Mozille u SPAJALICI

Predstavnici/e Mozilla Community Bosne i Hercegovine 28. jula posjetili su Obrazovno-raznodni centar za mlade SPAJALICA. Tokom posjete Mozilla se upoznala s radom Instituta za razvoj mladih KULT, aktuelnim projektima, kao i s principima rada s volonterima/kama. Također, uposlenici/e KULTA upoznali su se s ciljevima Mozilla Community BiH, njihovim projektima, i budućim aktivnostima.

- **Pokaži solidarnost - daruj krv!**

Uposlenici/e Instituta za razvoj mladih KULT su 15. jula imali priliku učestvovati u dobrovoljnoj akciji darivanja krvi. Akcija je održana u SPAJALICI, gdje nas je posjetila vrijedna ekipa Zavoda za transfuzijsku medicinu FBiH. Potrebe za krvlju povećavaju se naročito tokom ljetnih mjeseci. Dobrovoljno darivanje krvi predstavlja humanitarnu aktivnost ljudi koji tako šire ideje i osnovne postulate dobrovoljnog darivanja krvi poput anonimnosti, solidarnosti, poklanjanja i želje za



pomaganjem drugih, tako dajući lični doprinos u liječenju povrijeđenih i oboljelih.

- **Savjetovanje za mlade**

Misliš da bi mogao/la saznati više o sebi? Suočavaš se s nekim od problema koje ne uspijevaš riješiti ili se čak ne usuđuješ govoriti o njima s porodicom i prijateljima? Muče te neka pitanja? Želiš sebe bolje upoznati, naučiti nešto o emocijama, podići svoje samopouzdanje, sagledati svoje potencijale i sposobnosti onda je savjetovanje upravo ono što ti treba. Odgovore na ova i slična pitanja možeš dobiti u Obrazovno-raznodnom centru za mlade SPAJALICA jednom mjesečno i preko savjetovanje@kultbih.org. Aktivnost besplatnog savjetovanja za mlade se provodi u okviru Strategije za mlade općine Ilidža. Održava se u Obrazovno-raznodnom centru za mlade SPAJALICA, jednom mjesečno. Dolazak je potpuno besplatan. Posljednje druženje se održalo početkom jula, a govorilo se o sistemima podrške među ljudima, prijateljima, u porodici, na poslu itd. Plan je da naredna tema bude religija, tačnije religijski identitet.

- **Dajte njima i sebi šansu za bolji život!**

Prema brojnim naučnim istraživanjima, najbolji način da se poboljša život djece s posebnim potrebama je omogućiti im komunikaciju i druženje, te uvesti ih u proces obrazovanja sa vršnjacima, kroz škole i predškolske institucije. Nažalost, inkluzija djece s umjerenom i težom mentalnom ometenosti ne prakticira se u okviru regularnog obrazovnog sistema u Bosni i Hercegovini. U nastavku vam donosimo utiske volonterskog rada Johannesesa Oesterwinda, volontera Instituta za razvoj mladih KULT, koji je volontirajući u Institutu za specijalno obrazovanje djece s posebnim potrebama Mjedenica proveo 5 mjeseci. Johannes boravi u Bosni i Hercegovini u sklopu programa razmjene njemačkih volontera/ki u BiH.

Johannes Oesterwind, KULT: "Sa prvim proljetnim zrakama sunca u Sarajevu, ja sam došao u Mjedenicu, Institut za specijalno obrazovanje djece sa posebnim potrebama. Došao sam da volontiram, da naučim kako da se odnosim prema njima, te kako da komuniciram i radim sa njima. Želio sam vidjeti ko su oni i kako žive. Sada kada znam, želim da i drugi to znaju, djeca sa posebnim potrebama su posebna na mnogo načina. Entuzijastični su, nasmijani i razigrani. Igrali smo se karata i nogometa, pjevali smo i plesali i iz dana u dan dobijao sam osjećaj da sam i ja, kao što su i oni, sretan što provodimo vrijeme zajedno. Najimpresivnija, za mene, bila je njihova prirodnost, kažu ono što misle i rade ono što žele. Na taj način oni su slobodniji, nego što ćemo mi to ikada biti. Nakon 5 mjeseci volonterskog rada, mogu vam preporučiti da volontirate u društvenoj instituciji kao što je Mjedenica. Siročad i djeca sa poteškoćama u razvoju trebaju nekoga kome je stalo do njih dovoljno da poruši zidove izolacije oko njih, da se zbliži s njima i da im bude prijatelj. Dajte njima i sebi šansu za bolji život! Čak i ako nemate dovoljno vremena za volontiranje, možete ih usrećiti malim poklonom, tako što ćete im pokloniti svoje stare igračke!"



UDRUŽENJE ZA PREVENCIJU OVISNOSTI NARKO-NE

Josipa Vancaša 21/2, Sarajevo

Tel./fax: +387(0) 33 215 088, 33 223 285

Web site: www.narkone.org

E-mail: narkone@bih.net.ba

• 10 GODINA UG NARKO-NE U VITEZU

„*We are all different, but the same*“ - je ovogodišnji slogan kojim su mladi volonteri/ke iz Viteza i Vareša, zajedno sa studentima/cama iz Švicarske započeli manifestaciju povodom 10 godina postojanja projekta *Interkulturalne kreativne sedmice/tjedni IKS*, koji se uspješno realizovao i napredovao u ovim gradovima.

Početak manifestacije koja se održala 29.07.2011. u Kino dvorani Vitez, sa početkom u 10.h u gradu, u kojem je ovaj projekat počeo i prvi put se realizovao. Nakon oficijelnog dijela Općina Vitez se pobrinula da gosti uživaju u predvečernjim satima u dobrom bendu i zakusci.

Preko 50 mladih ljudi u Varešu i Vitezu kojima je ipak „**bolje džabe raditi nego džabe ležati**“ su se prijavili za sudjelovanje na ovogodišnjem IKS-u. Zajedno sa 12 studenata/ica fakulteta i visokih škola za umjetnosti, za pedagogiju i socijalnu pedagogiju iz Švicarske i Njemačke, su po **10. put** organizirali zanimljive i zabavne aktivnosti i za djecu i mlade tokom ljetnog raspusta. Nakon prvobitne edukacije se realizuju volonterske aktivnosti kojima će uljepšati svoju sredinu i obogatiti socijalni život u njihovim gradovima.

Pored volontera, tu su bili i brojni gosti koji su svojim prisustvom uveličali ovaj događaj, i iskazali zadovoljstvo što su dio jedne veoma važne ideje koja se pretvorila u stvarnost. Jedan od njih je i načelnik općine Vitez, gospodin **Vlado Alilović**, koji je rekao da ne može da vjeruje kako je prošlo 10 godina od kako se ovaj projekat počeo održavati u Vitezu, i da su mladi toliko toga naučili, i boreći se protiv ovisnosti dalje širili ovaj projekat.

S.Magdalena je također spomenula da je kroz ovaj projekat prošlo oko 340 volontera iz Viteza, Vareša i Busovače, iz Švicarske 120 studenata od kojih su neki dolazili po 2-3 puta. „Stvorene su veze, koje su pokazale da ako želiš mijenjati svijet, treba da počneš od sebe. Svjetlija i zdravija budućnost ne pada s neba, nego je treba tražiti tu“, dodala je direktorica.

Vitežanke, volonterke desete generacije, **Medina, Ana, Karolina, Hanka, i Merima** su kroz „IKS-Sijelo“ predstavile projekte koji su u njihovom gradu i Varešu urađeni tokom 10 godina, a neki od njih su: uređenje dječijeg vrtića Vitez, gradskog parka, IKS-Sofa - kreativne radionice sa romskom djecom, exchange market, uređenje dvorišta srednje škole Vitez, ljubavni park u Varešu, Partizan-igralište, igre na pločniku i mnogi drugi.

Svoju zahvalu za ovaj projekat i nadu da će se nastaviti su pokazali i čelnici općina Vitez i Vareš, **gospođa Marija Grabovac**, pomoćnica načelnika za društvene djelatnosti Vitez, i gospodin **Rusmir Berberović**-pomoćnik načelnika za društvene djelatnosti i BIZ u Varešu.

Pored ovih dobrih ljudi koji su godinama pratili i davali podršku IKS-u na razne načine tu su bili i predstavnici partnerskih organizacija **fra Stipan Radić**, ravnatelj Kruha Sv. Ante te **Lea Zanola**, Švicarska agencija za razvoj SDC, koja je svojim riječima podrške ukazala na to da uključivanje



u ovakvu vrstu projekta znači aktivno doprinosti odgovornom i inkluzivnom društvu, u kojem se svaki pojedinac može pronaći kao osoba i osjećati u sigurnom okruženju.

Mladi Varešani su izveli zanimljivu predstavu o istinitoj ljubavnoj priči koja se desila u njihovom gradu. Naime radi se o dvoje zaljubljenih, Akifu i Anki, koji se zbog razlika nisu mogli voljeti i biti sretni jer im to drugi nisu dopuštali. Ovim su htjeli poručiti drugima, da nisu bitne razlike među ljudima sve dok žele isto, da se mladi trebaju boriti protiv ovisnosti na zdrave načine, da u današnjem teškom vremenu postoji iskra budućnosti, i da ma kako teško bilo može se uspjeti ako se dovoljno vjeruje i voli.

Mlade je svojim govorom podržao i **prof. dr. Ismet Dizdarević**, predsjednik UG NARKO-NE: “Mladi ljudi su različiti, sa posebnim osobinama, ali su svi jednaki u tome da žele pomoći onima koji bi jednog dana mogli krenuti lošim putem. Kada se mladima omogući prilika da budu kreativni... onda će sigurno uspjeti.”

NOVI ČLANOVI

Sa zadovoljstvom vam predstavljamo nove članove – pojedince:

Alen Hadžiefendić, Banovići

e-mail: alen_hadziefendic@hotmail.com

„Član sam mnogobrojnih udruženja i asocijacija koji se bave omladinom i omladinskom problematikom, takođe učestvovao sam i učestvujem u mnogobrojnim seminarima i kongresima interkulturalnog obrazovanja i razvoja evropskih omladinskih ideja. To je uvjetovano, što sam apsolvent na pedagogije-psihologije i samim time sam i profesionalno i lično fokusiran na omladinski aktivizam i društvene probleme.

Omladinska politika je strategija koju kreira država za mlade u saradnji sa njima a u cilju poboljšanja opšteg položaja. U skladu sa ovim vlast kreira određene zakone kojima će se regulisati prava mladih. Nije dovoljno samo usvojiti zakon nego ga i primjenjivati u praksi. Naime prijemom u određene evropske institucije i potpisivanjem određenih dokumenata kao što su Bijela knjiga i evropska povelja o učešću mladih na lokalnom i regionalnom nivou, država se obavezala da će obezbijediti infrastrukturu i sredstva za rad mladih. Mladi ipak nisu dovoljno informisani o ovome, kako i na koji način mogu ostvariti svoja prava.”

Slobodanka Iljukić, Tuzla

e-mail: boba_sl@live.com

Dosadašnja iskustva: Seminari: „Mladi u sukobu sa zakonom (Biro za ljudska prava)“, „Komunikacija i rješavanje konflikta“, „Kreativno izražavanje slikanjem (Amica Educa)“, Seminar iz Migracija (IOM), Seminar za trenere programa „Uspjet ću“ aktivno traženje posla Papilot, Slovenija. Trenutno radim kao karijerni savjetodavac na projektu Yerp u na zapošljavanju i sprečavanju odlaska mladih ljudi van BiH, te promovisanju volonterizma mladih ljudi.....

INFORMACIJE/POZIVI/SEMINARI



Ulica Maršala Tita 135
88000 Mostar, BiH
tel./fax: +387 36 558 485
e-mail: cdo@bih.net.ba

1. Centar za dramski odgoj Bosne i Hercegovine priprema 14. Međunarodnu konferenciju koja će imati temu:

„INKLUZIJA MANJINA”

Konferencija će biti održana u Mostaru, Bosna i Hercegovina od 24. do 26. februara 2012. godine. Konferencija će poseban akcenat dati na zajedničko djelovanje Hrvatskog centra za dramski odgoj, Centra za dramu u umjetnosti i edukaciji Srbije i Centra za dramski odgoj Bosne i Hercegovine u realizaciji velikog međunarodnog projekta o inkluziji Roma. Molimo sve zainteresirane da se jave do 31. 12. 2011. godine:

tel.: +387 36 558 485 ili na e-mail: cdo@bih.net.ba

Očekujući Vaš interes za ovu temu srdačno Vas pozdravljam, Direktor, Sejo Đulić

2. POZIV ZA SIDU 2011. - UDRUŽENJE ZA DEMOKRATSKI PROSPERITET - ZID

Imam zadovoljstvo da vas obavijestim da Udruženje za demokratski prosperitet - Zid priprema događaj SIDU 2011 koji će biti održan od **23. do 30. septembra 2011.** Seminar će biti održan u Podgorici, Crna Gora.

Glavne teme ovog seminara će biti: Evropsko poglavlje o aktivnom učešću mladih, građansko obrazovanje, mladi kao aktivni i odgovorni građani, mladi i njihova socijalna prava...

Ciljevi seminara su:

-Povećati kvalitetu rada omladinskih nevladinih organizacija, aktivno učešće mladih na svim razinama kroz rad sa mladim ljudima i poboljšavanjem njihovog znanja i vještina povezanih sa pokretljivošću mladih kao bitan alat za socijalno uključenje i socijalni integritet mladih.

-Povećati problem vidljivosti socijalno ugroženih grupa mladih iz različitih dijelova Evropskih država kao objektivnih uticaja diskriminacije na socijalno uključenje mladih i njihovih socijalnih prava.

-Povećati sposobnost mladih u razumijevanju pozicije socijalno ugroženih mladih i u prepoznavanju novih alata za neformalnu edukaciju u svrhu smanjenja diskriminacije putem prakse koja uključuje korištenje i razmjenu primjera .

-Povećati vještine i znanje vezane za upravljanje volonterizmom. Povećati pokretljivost mladih kao alat za povećanje socijalne uključenosti mladih iz diskriminirajućih i isključenih grupa. Povećati broj aktivnih učešća mladih u programima namjenjenim socijalnom uključanju mladih.

-Promovisati glavnu odluku i deklaraciju prihvaćenu od strane Evropskog vijeća koja će ohrabrivati i doprinositi mladim ljudima i omladinskim organizacijama u izvršavanju prioriteta na lokalnim nacionalnim razinama.

Više informacija:

<http://www.zid.org.me/>, tel./fax: +382 20 20 71 30, 20 71 31, e-mail: programs@zid.org.me

Aplikacija na linku:

<http://xa.yimg.com/kq/groups/14751770/1670336382/name/Application%20form,%20ADP-Zid.doc>

DONATORI/ŠKOLARINE/STIPENDIJE

1. WACC poziv za projekte

WACC je međunarodna ekumenska profesionalna organizacija koja promovira komunikaciju za društvenu promjenu. Podržava projekte komunikacije prije svega u zemljama u razvoju.

Ovim putem pozivaju organizacije da predaju sažetke prijedloga projekata (Concept Notes) za projekte koji počinju sredinom januara 2012. godine ili kasnije.

Rok za prijem sažetaka projektnih prijedloga je 11. septembar. Odlučivanje u ovoj fazi je do 23. septembra, nakon čega će samo uspješni aplikanti biti pozvani da predaju pune prijedloge projekata.

WACC daje podršku za projekte vrijednosti do 30.000 eura, ali većina projekata je između 5.000 i 10.000 eura.

Projektne područja za koja se obezbjeđuje podrška su:

- prepoznavanje i izgradnja prava komunikacije
- mediji i gender pravda
- komunikacija za mir
- komunikacija i siromaštvo
- SIDA, komunikacija i stigma
- komunikacija za ekumenizam

WACC je posvećena gender jednakosti i očekuje da je projekti demonstriraju. WACC ohrabruje apliciranje aplikacija koji uzimaju u obzir potrebe mladih ljudi i osoba sa poteškoćama. Inicijative zastupanja (lobiranje, umrežavanje, razmjene znanja, podizanje svjesnosti) su dobro došle, kao i drugi pristupi i strategije.

Aplikacije se prihvataju od organizacija civilnog društva, uključujući crkvene institucije, i druge lokalne organizacije. WACC ne podržava aplikacije fizičkih lica ili vlasti.

Više informacija i vodič za aplikante je u prilogu, te posjetite web-stranicu:

<http://www.waccglobal.org/en/programmes/wacc-project-support-how-does-it-work.html>

2. Poziv na učešće u ProCredit Bank programu "Mladi bankar"

ProCredit Bank je finansijska institucija koja je usmjerena ka pružanju usluga odgovornog bankarstva vrlo malim, malim i srednjim preduzećima. Banka ulaže dosta napora u finasijsku edukaciju i informisanje građana i privrednika kako bi pomogla donošenju adekvatnih finasijskih odluka. Podržavajući edukaciju mladih i perspektivnih ljudi u BiH, a sa željom da grade dobre osnove ka budućem zanimanju u okviru banke, ProCredit Bank organizuje, po prvi put u BiH, Program obuke „Mladi Bankar“.

Program „Mladi Bankar“ je namijenjen apsolvencima ekonomskih fakulteta. Program obuke počinje 12. septembra/rujna 2011. godine i trajat će šest mjeseci. Program se sastoji od teoretske i praktične obuke iz oblasti finansija i bankarstva. Mjesto održavanja programa je Sarajevo, dok se praktični dio

programa obavlja u poslovnim jedinicama ProCredit Bank širom Bosne i Hercegovine.

Minimalni uslovi za učešće u Programu „Mladi bankar“ su slijedeći: Završen I ciklus Ekonomskog fakulteta (minimalan uslov su položeni svi ispiti za I ciklus studija i zvanja Bachelor); prosjek ocjena iznad 8,00.

Od kandidata se očekuje da budu ambiciozni, fleksibilni, pouzdani, samoinicijativni, da imaju razvijene komunikativne, prezentacijske i analitične vještine, te da poznaju engleski jezik i rad na računarima.

Prijava za Program „Mladi bankar“ treba sadržavati:

1. CV (u standardnom obrascu dostupnom na web stranici www.procreditbank.ba u sekciji „Prijave za posao“;
2. Pismo motivacije, koje jasno opisuje zbog čega smatrate da ste upravo Vi odgovarajuća osoba za stručno usavršavanje u ovoj instituciji;
3. Pismo preporuke od strane profesora;
4. Uvjerenje o položenim ispitima i prosječnoj ocjeni.

Rok za dostavljanje prijava je 15. august/kolovoz 2011. godine.

Prijave možete dostaviti na e-mail adresu: mladibankar@procreditbank.ba

ili poštom na adresu:

ProCredit Bank d.d.,
Program „Mladi bankar“,
Ul. Emerika Bluma 8,
71 000 Sarajevo.

Odabir kandidata će se obaviti u prvoj sedmici septembra/rujna.

3. Konkurs za najbolju kratku video priču

NVO 35 mm i web portal e-Balkan.net raspisuje **KONKURS ZA NAJBOLJU KRATKU VIDEO PRIČU**

Konkursom se traže nove i originalne teme u kojima kandidati predstavljaju svoj pogled na svijet, društvene pojave, probleme i teme od javnog interesa koje su uočili. Ključno je da video-priča predoči novi aspekt, analizira stanje iz nove perspektive, otvori nova pitanja i finalno postavi određenu temu u žižu javnosti.

Rok za predaju radova je svaki 20ti u mjesecu tokom 2011. godine, počevši od 20tog jula, a formular za prijavu možete preuzeti sa sajta

www.e-Balkan.net

Uslovi prijave:

Kandidovana video-priča u trajanju od najviše 3min, mora biti nova i neobjavljivana u medijima (pod medijima podrazumjevamo i youtube, vimeo i slične internet medije). U izbor ulaze sledeći video formati: avi, mov, mp4, mpg, mpeg4, asf, m2t, m2ts. Očekujemo uglavnom radove snimljene kamerama na mobilnim telefonima, ali i sve druge kamere su u konkurenciji. Posebno podstičemo učešće studenata, mladih režisera i istraživača, ali i svih građana i građanki kreativnog duha.

Forma prijave:

Pored ličnih podataka, prijava treba da sadrži i fotografiju kandidata, kao i kratku biografiju (3-4 rečenice).

Nagrade:

Stručni žiri u sastavu: **Zoran Zonjo Marković** (TBOK), **Aleksandar Saša Božović** (e-Balkan.net) i **Darko M. Ivanović** (e-Balkan.net i TV IN), ocjenjivaće pristigle radove.

Prvonagrađeni rad za tekući mjesec će biti objavljen na portalu 1.vog sledećeg meseca, a autor/ka dobija i novčani dio nagrade u iznosu od 100e.

Žiri može svakog meseca dodjeliti i do tri nagrade objavljivanja rada na portalu, bez novčanog dijela nagrade. Takođe, žiri zadržava pravo da ne dodjeli nijednu nagradu za bilo koji mesec.

Prijave, sa naznakom "Za konkurs", slati na **35mmproduction@gmail.com**

Za više informacija posjetite:

<http://www.e-balkan.net/istrazivacko-novinarstvo/10-istrazivacko-novinarstvo/6308-konkurs-za-najbolju-kratku-video-priu.html>

Dragi prijatelji,

Ukoliko ste zainteresovani da se u mjesečnom informativnom biltenu Omladinskog Resursnog Centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30.-ti u mjesecu.

WEB Stranica Mreže:

sCh design
Webmaster:

Emir Delalić-Zeko - Tuzla
emir.delalic@gmail.com

web: www.omladina-bih.net
mejling lista Mreže:
posta@omladina-bih.net

Adrese za slanje vaših informacija za mjesečni bilten:
hcatuzla@bih.net.ba; orctuzla@bih.net.ba
fax: 035 258 077

hCa Tuzla
Hadži Bakirbega Tuzlića 1,
75000 Tuzla
tel / fax: 035 258 077
e-mail: orctuzla@bih.net.ba
hcatuzla@bih.net.ba

Mjesečni bilten uređuje Omladinski resursni centar - ORC Tuzla